

Mid-Day Dogri News Bulletin, 17th July 2025

समे – 12:25

<><><><><><>

LG-Seminar

उपराज्यपाल मनोल सिन्हा होरें आखेआ जे पहलगाम आतंकी हमले दे पिच्छे जेहड़े बी लोक हैन उंदी पंछान करी लैती गेदी ऐ। एनआईए दी जांव इस गल्ला गी जकीनी बनाव जे इंदा बी उयै हाल होए जेहड़ा आतंकवादी दे सिरे दे कमांडरें दा होंदा ऐ। आतंकवाद पाकिस्तान दे डीएनए च ऐ। एह गल्ल उनें नमीं दिल्ली च गांधी स्मृति आस्सेआ आयोजित इक सैमीनार जेएंडकेमार्च टूर्वर्डस पीस च आक्खी। इस मौके पर उपराज्यपाल होरें नमीं विकसित गांधी स्मृति आर्ट गैलरी दा उद्घाटन कीता।

<><><><><><>

CM-IIT

मुख्यमंत्री उमर अब्दुल्ला होरें कल आईआईटी जम्मू च आयोजित “समर स्कूल 2025” दे समापन समारोह च हिस्सा लैता। जेहदे कन्नै गै म्हीना भर चले दा एह विशेष कार्यक्रम कामयाबी कन्नै सम्पन्न होइ गेआ जेहदे च मुख्खे दे बक्ख-बक्ख हिस्सें थमां 1 जहार कोला मते विद्यार्थिएं शिरकत कीती। इस समारोह गी संबोधत करदे होई मुख्यमंत्री होरें आईआईटी जम्मू दी सराहना कीती जेहड़ा छमता ते प्रतिभा दे इक प्रमुख केन्द्र दे रूपै च कम्म करै करदा ऐ ते इस चाल्ली दे आयोजन राएं नोजवानें गी ज्ञान ते समर्था कन्नै लैस करै करदा ऐ। उनें आखेआ जे इस चाल्ली दे कार्यक्रम दी मदद कन्नै विद्यार्थिएं दी सोच, जानकारी, समझ ते जागरूकता दा दायरा बधदा ऐ ते होरने विद्यार्थिएं कन्नै बचारे दा आदान प्रदान बी उंदे विकास लेई मता लाहकारी साबत होंदा ऐ। मुख्यमंत्री होरें आखेआ जे जम्मू कश्मीर सरकार बक्ख-बक्ख क्षेत्रें ते मंचें पर आईआईटी जम्मू दा सैह्योग बधानें पर कम्म करै करदी ऐ जिंदे च जल संरक्षण, जलवायु परिवर्तन, उद्योगिक विकास ते बपार कारोबार शुरू करने लेई मुंडली जानकारी ते सिखलाई ते होर केई क्षेत्र बी शामिल न।

<><><><><><>

CM Status

मुख्यमंत्री उमर अब्दुल्ला होरें कल जम्मू दे गांधी नगर आले जागते दे सरकारी हायर सकेंडरी स्कूल च साबका प्रिंसिपल सुर्गवासी कुलदीप कुमार बड़ेयाल हुंदी मूर्ति परा पड़दा गोहाड़ेया। इस मौके अपनी ड्यूटी अंजाम दिंदे होई शहीद होए दे इस शिक्षक गी श्रद्धांजलि भेंट कीती गई। कार्यक्रम च केई वरिष्ठ सरकारी अफसर, विधायक, टीचर, विद्यार्थी ते आम लोक बी मजूद हे। इस मौके मुख्यमंत्री होरें शहीद प्रिंसिपल दे बलिदान गी चेता करदे होई आखेआ जे इक अध्यापक दे रूपै च विद्यार्थिएं दे जीवन गी ज्ञान दी लोह कन्नै रोशन करने आले कुलदीप कुमार बड़ेयाल होरें गी सदा सदा लेई चेता रखेआ जाग। उनें घोषणा कीती जे स्कूल दा नां बी उंदे नांह पर रखेआ जाग।

<><><><><><>

Amarnath Yatra

कश्मीर ते जम्मू खित्ते दे मते सारे हिस्से च खराब मौसम दे चलदे श्री अमरनाथ जी दी यात्रा आरजी तौर पर रोक दीत्ती गई ऐ। बालटाल ते पहलगाम आले रस्ते पर भारी बरखा दे चलदे यात्रा गी अज्ज लेई स्थगित कीता गेआ ऐ। जम्मू दे भगवती नगर आले आधार शिविर थमां इक अधिकारी नै आकाशवाणी समाचार गी जानकारी दित्ती ऐ जे अज्ज जम्मू थमां घाटी लेई यात्रा गी रवाना होने दी इजाजत नेई दित्ती गई। उआं कल संजा तगर तकरीबन 2 लक्ख 50 ल्हार श्रद्धालुएं पवित्र गुफा च मत्था टेकी लैते दा ऐ।

<><><><><><>

Legislator Rana

विधायक मुबारक गुल, पवन कुमार गुप्ता ते प्यारे लाल शर्मा होरें जल शक्ति ते जनजातीय मामलें दे मंत्री जावेद अहमद राणा हुंदे कन्नै मलाटी कीती। इस दरान उनें लोकें दी भलाई बेह्तरी, जंगलें दी हिफाजत, जनजातीय सरबंधी मामलें ते पीएचई मैहकमे कन्नै जुड़े दे केई मामलें पर चर्चा कीती। गल्लबात दरान विधायकेंअपने अपने विधानसभा क्षेत्र दे मामले उंदे अग्रे रखे। राणा होरें उंदी चिंताएं गी धरोइयै सुनेआ ते मुत्तलका अधिकारिएं गी इंदे तौले नबेड़े लेई हिदायां जारी कीतिया।

<><><><><><>

जम्मू कश्मीर च हुनर विकास सरबंधी तंत्र च बदलाव करने दे मकसद कन्नै श्रीनगर दे शेर-ए-कश्मीर इंटरनेशनल कांफ्रेंस सेंटर च 2 रोजा कांफ्रेंस दा सरिस्ता कीता गेआ। कांफ्रेंस च इस दरान मंत्री दे आधार पर हुनर दी सिखलाई देने आले कार्यक्रम, गल्लबात आले सत्र दा बी सरिस्ता कीता गेआ ऐ। प्रतिभागिएं गी भविक्ख दी मंग दे स्हाबै हुनर विकसित करने उद्योगें मूजब सिखलाई बारे दस्सेआ गेआ ऐ। मुख संबोधन च मुख सचिव अटल डुल्लू होरें उद्योगें स्हाबै पैदा होने आली जरूरतें ते हुनर विकास आले सरिस्ते गी बेहतर करने पर जोर पाया। उनें उद्योग ते शिक्षा इदारे दी सांझ भ्याली पर बी जोर दित्ता। उनें आखेआ जे समर्थ च कन्नो कन्नी बाद्धा करदे रौहना गै कामयाबी दी कुंजी ऐ।

<><><><><><>

UIDAI

भारतीय विशिष्ट पंछान सरबंधी प्राधिकरण यूआईडीएआई ने मरे दे लोकें दे आधार नंबरें गी बंद करियै आधार डेटाबेस गी सटीक ते बसाह् भरोसे आला बनाइयै रखने लेई सकारात्मक गैह् पुट्टी ऐ। एह्दे लेई यूआईडीएआई नै आधार कार्ड बंद करने दे सरबंधै च 1 करोड़ 5 लक्ख लोक जिंदी मौत होई चुकी दी ऐ, दा पता लाने लेई भारत दे रजिस्ट्रार जनरल दे कन्नै सैहयोग कीता ऐ। इलैक्ट्रानिक्स ते सूचना प्रौद्योगिकी मंत्रालय नै इक ब्यान च आखेआ ऐ जे भारत दे रजिस्ट्रार जनरल नै नागरिक पंजीकरण प्रणाली सीआरएस दा इस्तेमाल करियै 24 राज्यें ते केन्द्र शासत प्रदेशें दे तकरीबन 1 करोड़ 17 लक्ख आधार नंबर बंद करी दित्ते न।

<><><><><><>